

07 DEC 1996

DR MAHATHIR TEMU RAJA FAHD

Oleh: Zulkefli Salleh

RIYADH, 7 Dis (Bernama) -- Perdana Menteri Datuk Seri Dr Mahathir Mohamad bertemu dengan Raja Fahd malam tadi di Istana Al-Yamamah di sini.

Dr Mahathir diringi oleh lima orang Menteri -- Menteri Luar Datuk Abdullah Haji Ahmad Badawi, Menteri Pendidikan Datuk Seri Najib Tun Razak, Menteri Pertahanan Datuk Syed Hamid Albar dan Menteri di Jabatan Perdana Menteri Datuk Abang Abu Bakar Mustapha dan Datuk Dr Abdul Hamid Othman.

Turut berada semasa pertemuan itu ialah Putera Mahkota Abdullah Abdul Aziz Al-Saud, yang juga merupakan Timbalan Perdana Menteri dan pemerintah tentera negara itu.

Dr Mahathir tiba di ibu negara diraja ini dengan pesawat khas dari Madinah pada hari ketiga lawatan rasmi empat hari beliau ke Saudi Arabia.

Putera Mahkota itu juga mengadakan majlis makan malam sebagai penghormatan kepada Perdana Menteri yang turut disertai oleh pegawai-pegawai kanan kedua-dua pihak.

Hari ini Dr Mahathir akan melawat Bandaraya Sains dan Teknologi Raja Abdul Aziz di sini dan bertemu dengan anggota-anggota Al-Syura Saudi Arabia.

Dr Mahathir dijangka berucap di satu majlis makan tengah hari bersama Dewan Perniagaan dan Perindustrian Saudi kemudiannya.

Beliau akan berlepas ke Mekah pada sebelah petang untuk mengerjakan umrah esok. -- BERNAMA

ZKS PR